

Headline **Kemelut MCA perlu diselesaikan segera**
Date **23 Feb 2010**
MediaTitle **Berita Harian**
Section **Nasional**
Journalist **Shaarani Ismail**
Frequency **Daily**
Circ / Read **192,917 / 1,521,000**

Language **Malay**
Page No **10**
Article Size **187 cm²**
Color **Full Color**
ADValue **3,967**
PRValue **11,900**



Kemelut MCA perlu diselesaikan segera

Shaarani Ismail

KUALA LUMPUR: Krisis dalaman MCA yang membabitkan kepimpinan MCA perlu segera diselesaikan bagi memastikan maruah parti itu tidak terus tercalar hingga boleh menyebabkan rakyat hilang kepercayaan dan memberikan kesan pada pilihan raya umum akan datang.

Naib Presiden MCA, Datuk Seri Liow Tiong Lai, berkata kegagalan menyelesaikan masalah itu dengan segera akan turut melemahkan Barisan Nasional (BN).

"Apa yang berlaku sekarang ini, semua pemimpin atasan MCA membelakangkan parti terutama dalam isu membabitkan Presiden dan Timbalan Presiden parti hingga menjadikan seolah-olah Presiden dan Timbalan Presiden dipilih oleh ROS (Pendaftar Pertubuhan) dan bukannya parti.

"Masalah itu perlu diselesaikan dengan cepat bagi menjaga maruah dan kredibiliti parti. Masalah yang berlaku membabitkan individu bukan masalah wujudnya puak dalam MCA atau MCA berbalah," katanya ketika menjawab soalan yang dikemukakan Datuk Ahmad A Talib dalam rancangan Soal Jawab, yang disiarkan secara langsung oleh TV3, malam tadi.

Liow berkata, apa yang diharapkan kemelut dalaman MCA ketika ini dapat diselesaikan sebelum Perhimpunan Agung MCA, yang dijadualkan berlangsung 7 Mac ini kerana ketika ini orang ramai melihat MCA sebagai sebuah parti yang kucar-kacir.

"Dalam hati sanubari kita sepatutnya bukan kedudukan yang menjadi keutamaan. Apa yang penting parti terus kuat dan apa yang saya lakukan hanyalah menjalankan amanah yang diberikan oleh Jawatankuasa Pusat MCA.



"Masalah itu perlu diselesaikan dengan cepat bagi menjaga maruah dan kredibiliti parti"

Liow Tiong Lai
Naib Presiden MCA

"Bagi komuniti Cina, saya harapkan apa yang silap kita betulkan dan kita perlu tingkatkan azam untuk mengahdapinya (kemelut yang berlaku)," katanya.

Dalam pada itu, Liow yang juga Menteri Kesihatan ketika diminta menjelaskan wabak batuk kering atau TB yang semakin membimbangkan, mengakui jumlah kes yang dicatatkan sepanjang 2008 menunjukkan peningkatan sehingga 65 peratus atau kira-kira 17,000 berbanding jumlah kes yang dicatatkan pada 1985.

Katanya, antara faktor yang mengakibatkan kes itu meningkat adalah bertambahnya jumlah pesakit HIV positif, yang kebanyakannya disahkan juga menghidap TB.

Selain itu, katanya, kementerianya juga sedang melaksanakan kempen berjalan 10,000 langkah sehari kepada seluruh rakyat Malaysia bagi memastikan tahap kesihatan rakyat berada tahap baik.